

आकाशवाणी

- प्रधानमंत्री नरेंद्र मोदी ते फिलीपीन्स दे राष्ट्रपति मार्कोस जूनियर हुंदे बश्कार नमी दिल्ली च दपक्खी गल्लबात, भारत-फिलीपीन्स सरबंधें गी रणनीतिक सांझेदारी तोड़ी बदाने पर सहमत।
- उत्तराखंड दे उत्तरकाशी जिले दे धराली क्षेत्र च बढ़ल फट्टने करी भारी नुकसान, राहत ते बचाऽ अभियान जारी।
- संसद दे दौनें सदनं दी कार्यवाही विपक्ष दे हंगामे दे बाद दिन भर लेई स्थगित करी दित्ती गई।
- संसद नै मणिपुर च राष्ट्रपति शासन दी अवधि अगले 6 म्हीनें तोड़ी बदाने दे प्रस्ताव गी मंजूरी देई दित्ती ऐ।
- जम्मू-कश्मीर दे साबका राज्यपाल सत्यपाल मलिक हुंदा घाऽल होई गेआ, राष्ट्रपति द्रौपदी मुर्मू, प्रधानमंत्री नरेंद्र मोदी होरें उन्दे काल पर दुख ते शोक व्यक्त कीता।
- भारती मौसम विभाग नै कल तोड़ी केरल ते तमिलनाडू दे घाट आहले इलाकें च मती थमां मती भारी बरखें दी पेशनगोई कीती ऐ।

<><><><><><>

India-Philippine Talks

भारत ते फिलीपीन्स बश्कार अज्ज 9 समझौतें पर दस्तखत कीते गें एह समझौते प्रधानमंत्री नरेंद्र मोदी ते फिलीपीन्स दे राष्ट्रपति Ferdinand Romualder Marcos Junior दी मौजूदगी च कीते गे। इनें समझौतें च दोनें देशें बश्कार कूटनीतिक सहभागिता, आपराधिक मामलें, रक्षा, विान ते तकनीक सने होरनें क्षेत्रें च आपसी कनूनी सहायता संधि शामिल ऐ। मीडिया कन्नै गल्ल करदे होई प्रधानमंत्री होरें आखेआ जे भारत ते फिलीपीन्स अपने राजनयिक सरबंधें दी 75 मीं बरेगंड मनारदा ऐ ते फिलीपीन्स दे राष्ट्रपति हुंदी जात्तरा विशेष महत्व रखदी ऐ। श्री मोदी होरें पहलगाम आतंकी हमले दी कड़ी निंदा करे ते आतंकवाद दे विरुद्ध लड़ाई च भारत दा साथ देने लेई फिलीपीन्स दी सरकार ते राष्ट्रपति हुंदे प्रति आभारत व्यक्त कीता। उनें आखेआ जे भारत फिलीपीन्स च सावरन डाटा क्लाउड बुनियादी ढांचे दे विकास च बी सहयोग करोग।

<><><><><><>

MEA-India Philippines

भारत ते फिलीपीन्स आपसी सहयोग गी रणनीतिक सांझेदारी च बदलने पर सहमत होए न। नमी दिल्ली च अज्ज विदेश मंत्रालय च सचिव पेरियासामी कुमारन होरें आखेआ जे प्रधानमंत्री नरेंद्र मोदी ते फिलीपीन्स दे राष्ट्रपति फर्डिनेंड रोमुअलडेज मार्कोस होरें दपक्खी वार्ता च उन्नत रणनीतिक सांझेदारी तैहत सहयोग लेई बरे 2025 थमां 2029 लेई कार्ययोजना गी अखीरी रूप दित्ता ऐ। श्री कुमारन होरें आखेआ जे भारत ते फिलीपीन्स बश्कार बक्ख-बक्ख क्षेत्रें च 14 समझौता जापनें पर दस्तखत कीते गे। उनें आखेआ जे इनें समझौतें पर आपराधिक मामलें च आपसी कनूनी सहायता संधि,

सजा प्राप्त व्यक्तियों दे स्नानंतरण पर संधि, भारत-फिलीपीन्स अधिमान्य बपार समझौते दी शर्ते, सेवा शर्ते, सेना, वायु सेना ते नौसेना ते तटरक्षके बशकार बेहतर सहयोग शामिल ऐ।

<><><><><><>

Uttrakhand-Cloudburst

उत्तराखंड दे उत्तरकाशी जिले दे धराली क्षेत्र च बढ़ल फट्टने करी भारी नुकसान दी खबर ऐ। आपदा प्रबंधन दल घटना आहली थाहर पर राहत ते बचाव कम्में च लग्गे दा ऐ। मुख्मंत्री पुष्कर सिंह धामी होरें घटना पर दुख व्यक्त कीता ऐ। उनें सोशल मीडिया पोस्ट च आखेआ जे जिला प्रशासन, भारती सेना, राश्ट्री आपदा मोचन बल दे दल प्रभावित क्षेत्रें च राहत ते बचाव कम्में च लग्गे दे ना। लोकें गी प्राथमिकता दे आधार पर सुरक्षित थाहरें पर पजाया जा'रदा ऐ ते स्थिति दी निगरानी कीती जा'रदी ऐ। प्रशासन पूरी चाल्ली सतर्क ऐ ते प्रभावित लोकें तोड़ी हर मुमकन सहायता पुजा करदा ऐ। बढ़ल फट्टने करी खीर गंगा नदी च चानचक्क उफान आई गेआ जिस करी बड़ा मता नुकसान होआ ऐ। जिला आपातकाल अभियान केंद्र मताबक धराली बजार इलाके च भारी मलवे नै ईमारतें, होटलें ते हट्टियें गी मता नुकसान पजाया ऐ। धराली च हालात गी दिखदे होई उत्तरकाशी जिला प्रशासन नै हेल्पलाइन नंबर जारी कीते ना। नंबर इस चाल्ली न 01374-222126, 1374-222722 ते 9456556431

<><><><><><>

PM-Uttarkashi Cloud burst

प्रधानमंत्री नरेंद्र मोदी होरें उत्तरकाशी दे धराली च अज्ज बढ़ल फट्टने दे बाद उत्तराखंड दे मुख्मंत्री पुष्कर सिंह धामी हुंदे कन्नै गल्ल कीती ते स्थिति दी समीक्षा कीती। श्री मोदी होरें आखेआ जे राज्य सरकार दी निगरानी च बचाव दल हर मुमकन तरीके नै कम्म करारदी ऐ। प्रधानमंत्री मोदी होरें घटना च प्रभावित लोकें दे प्रति संवेदना व्यक्त कीती।

<><><><><><>

Amit-Shah Uttarkashi

गृह मंत्री अमित शाह होरें अज्ज उत्तराखंड दे मुख्मंत्री कन्नै धराली च चानचक्क हाड़ दी घटना दे सरबंध च गल्लबात कीती ते जानकारी हासल कीती। इक सोशल मीडिया पोस्ट च श्री शाह होरें दस्सेआ जे भारत-तिब्बत सीमा पुलस दी त्रै टीमां ते राश्ट्रीय आपदा प्रतिक्रिया बल दी 4 टीमां घटना आहली थाहर भेजी दित्तियां गेइयां ना।

<><><><><><>

Parliament Adjourned

संसद दे दौनें सदनें दी कार्यवाही अज्ज बिहार च आयोजित विशेष गहन पुरीक्षण अभ्यास दे मुद्दे पर विपक्षी दलें दे विरोध प्रदर्शन करी बाधित रेही। विपक्षी दल (SIR) सने होरनें मुद्दें पर चर्चा दी मंग करा रदे हे। लोकसभा ते राज्यसभा दी कार्यवाही अज्ज इक बार स्थगित होने दे बाद अखीरै च पूरे दिन भरै लेई स्थगित करी दित्ती गेई दपैहरी दो बजे पैहले स्थगन दे बाद जिसले लोकसभा दी कार्यवाही शुरू होई तां बरोधी दलें नारेबाजी शुरू करी दित्ती ते आसन दे सामने आई गे। पीठासीन

अधिकारी नै आखेआ जे सरकार हर मुद्दे पर चर्चा हर मुद्दें पर चर्चा लेई तैयार ऐ। पीठासीन अधिकारी दी बार-बार अपील दे बावजूद प्रदर्शनकारी सदस्यें अपना विरोध जारी रखेआ जिस करी सदन दी कार्यवाही पूरे दिन लेई स्थगित करी दित्ती गई।

<><><><><><>

Manipur

संसद नै मणिपुर च राष्ट्रपति शासन दी अवधि 13 अगस्त 2025 थमां अगले 6 महीने लेई बढ़ाने दे प्रस्ताव गी अपनी मंजूरी देई दित्ती ऐ। राज्यसभा नै अज्ज इस प्रस्ताव गी ध्वनिमत कन्नै पारित करी दित्ता। लोकसभा पिछले हफ्ते गै इसी मंजूरी देई चुकी दी ऐ।

<><><><><><>

PM-Article

प्रधानमंत्री नरेंद्र मोदी होरें अज्ज आखेआ जे लगातार सुधारें ते करसान केंद्रित पैहलें राहें कृषि क्षेत्र च तेजिया नै वृद्धि होई ऐ। कृषि ते करसान कल्याण मंत्री शिवराज सिंह चौहान हुंदे आसेआ लिखे गेदे इक लेख गी सांझा करदे होई श्री मोदी होरें इस गल्ल पर लौ पाई जे एह सुधार बरै 2047 तोड़ी विकसित भारत दे निर्माण च महत्वपूर्ण भूमिका निभागा। उनें आखेआ जे कृषि लक्खें लोकें दी आजीविका दा आधार ऐ।

<><><><><><>

Shivraj-LS

केंद्री कृषि ते करसान कल्याण मंत्री शिवराज सिंह चौहान होरें आखेआ जे सरकार नै पिछले 11 बरें च करसानें दी औदन बढ़ाने लेई कई गैं पुट्टियां ना। अज्ज लोकसभा च प्रश्नकाल दुरान पूरक सुआलें दा परता दिंदे होई श्री चौहान होरें आखेआ जे प्रधानमंत्री किसान सम्मान निधि तैहत करसानें दे बैंक खातें च 4 लक्ख करोड़ रपे सिद्धे मुंतकिल कीते गे ना। उनें आखेआ जे सरकार नै करसानें गी 14 लक्ख करोड़ रपे शा मते दी उवरक सब्सिडी बी प्रदान कीती ऐ।

<><><><><><>

Kartavya-Bhawan

केंद्री आवास ते शैहरी कार्य मंत्री मनोहर लाल होरें अज्ज आखेआ जे कर्तव्य भवन गी दिल्ली भर च कार्यरत बक्ख-बक्ख मंत्रालयें ते विभागें गी इक्के थाहर आहिनए दक्षता, नवाचार ते सहयोग गी बढ़ाने लेई सोची-समझियै डिजाइन कीता गेआ ऐ। नमी दिल्ली च इक प्रेस कांफ्रेंस गी संबोधित करदे होई उनें दस्सेआ जे प्रधानमंत्री नरेंद्र मोदी होर कल कर्तव्य भवन-3 दा उद्घाटन करंगन। उनें दस्सेआ जे एह अत्याधुनिक कार्यालय परिसर कोई 1 अशारिया 5 लक्ख वर्ग मीटर च फैले दा ऐ।

<><><><><><>

PM-kartavya Bhawan

प्रधानमंत्री नरेंद्र मोदी होर कल नमीं दिल्ली च कर्तव्य पथ पर नमें बनाए गेदे कर्तव्य भवन दा उद्घाटन करडन। इस मौके पर प्रधानमंत्री होर इक सार्वजनिक कार्यक्रम गी बी संबोधित करंगन। कर्तव्य भवन सेंट्रल विस्टा परियोजना दा गै इक हिस्सा ऐ। एह भवन प्रशासनिक प्रक्रियाएं ते शासन दी सुव्यवस्था दे मकसद कन्नै भविक्ख च तैयार होने आहले केंद्री सचिवालय भवनें च पैहला ऐ।

प्रधानमंत्री हुंदे दफ्तरै आसेआ जारी बयानै च दस्सेआ गोआ ऐ जे कर्तव्य भवन दे निर्माण दा मकसद बक्ख-बक्ख मंत्रालयें ते विभागें गी किट्टे आहिनए दक्षता, नवाचार ते सहयोग गी बढ़ावा देना ऐ।

<><><><><><>

Satyapaul-Malik Dies

जम्मू-कश्मीर दे साबका राज्यपाल सत्यपाल मलिक हुंदा लम्मी बमारी दे बाद मंगलवारें 79 बरें दी उम्री च काल होई गोआ। अज्ज दपैहरी कोइ 1 बजे नमीं दिल्ली दे राम मनोहर लोहिया अस्पताल च उनें खीरी साह लैता। मलिक होर अगस्त 2018 थमां अक्तूबर 2019 तगर जम्मू-कश्मीर दे अखीरी गवर्नर रेह। उन्दे गै कार्यकाल दरान अनुच्छेद 370 गी रद्द करी दित्ता गोआ हा ते 5 अगस्त 2019 गी जम्मू-कश्मीर गी केंद्र शासित प्रदेश बनाई दित्ता हा। राष्ट्रपति द्रौपदी मुर्मू ते प्रधानमंत्री नरेंद्र मोदी होरें सत्यपाल मलिक हुंदे निधन पर बसोस जाहिर कीता ऐ।

<><><><><><>

IMD

भारती मौसम विभाग नै कल तोड़ी केल ते तमिल नाडु दे घाट आहले इलाकें च मती गै भारी बरखें दी पेशनगोई कीती ऐ। केरल दे किश हिस्सें च खास करियै इदुक्की, इरनाकुल्लम ते त्रिसुर जिले च बडुलै थमां गै बरखा होआ करदी ऐ। इनें इलाकें च बडुलै थमां गै मती भारी बरखें दा रेड अलर्ट जारी कीता गोआ हा। दपैहरी थमां 4 जिलें इरनाकुल्लम ते त्रिसुर, इदुक्का ते मल्लपुरम च ताजा रेड अलर्ट जारी कीता गोआ ऐ। विभाग नै अगले 3 थमां 4 दिनें दरान तमिलनाडु, केरला, माहू, तटीय ते दक्खन अंदरूनी कर्नाटक, तटीय आंध्र प्रदेश ते लक्ष्यद्वीप च मती थमां मती भारी बरखें दी पेशगोई कीती ऐ। भारी बरखें ते हाड आहले हालात गी दिखदे होई Jaunpur, Farukhabad, Pilibhit, Bareilly ते प्रयागराज च अज्ज स्कूल बंद रक्खे गे हे।

<><><><><><>

Pakistan-Ban

पाकिस्तान तहरीक-ए-इंसाफ पार्टी आसेआ प्रस्तावित राष्ट्रव्यापी विरोध प्रदर्शन शा पैहले पाकिस्तान दी राजधानी इस्लामाबाद च धारा 144 तैहत सार्वजनिक समारोहें पर प्रतिबंध लेई दित्ता गोआ ऐ। पार्टी नेताएं मताबक एहू बरोध प्रदर्शन साबका प्रधानमंत्री इमरान खान हुंदी जेल थमां रिहाई दी मंग गी लेइयै कीता जा'रदा ऐ। एहू प्रतिबंध इस लेई लाया गोआ तां जे इमरान खान हुंदी पार्टी अज्ज साबका प्रधानमंत्री हुंदी नजरबंदी दे 2 बरे होने पर देशव्यापी बरोध प्रदर्शन करने दी योजना बना रदी ऐ।

<><><><><><>

Boxing

भारती मुक्केबाजी महासंघ नै चौथी सब जूनियर अंडर-15 जागतें ते कुडियें दा राष्ट्री मुक्केबाजी चैंपियनशिप दी तरीकें दी घोषणा करी दित्ती ऐ। एहूदा आयोजन 7 थमां 13 अगस्त तोड़ी उत्तर प्रदेश दे ग्रेटर नोएडा च होग। प्रतियोगिता च 700 शा मते युवा मुक्केबाज शामिल होंगन। इन्दे च 13 शा 14 बरे दी बरेसू दे 400 जागत ते 300 कुडियां शामिल न। एहू 15 भारत वर्ग च मकाबले करंगन।

PMMVY

महिला ते बाल विकास मंत्रालय नै प्रधानमंत्री मातृ वंदना योजना आस्तै खास पंजीकरण इस म्हीने दी 15 तरीक तगर बदाई दित्ता ऐ। आंगनवाडी ते आशा कार्यकर्ताएं आसेआ घर-घर जाइयै जागरूकता प्रसार ते नामांकन अभियान दा मकसद सारी गर्भवती ते दुध पलाने आहली माएं तगर पुज्जना ते योजना तैहत समेंसिर उंदा पंजीकरण यकीनी करना ऐ। एह योजना गर्भवती ते दुध पालने आहली माएं गी पोषक ते सत्तदार खुराक आस्तै माली सहायता उपलब्ध करोआंदी ऐ ते उनेंगी सेहत सरबंधी पूरी दिक्खभाल आस्तै जागरूक करदी ऐ।

Padma-Awards

पद्म पुरस्कारें लेई नामांकन ते सफारशें दी खीरी तरीक 15 अगस्त तोहड़ी बधाई दित्ती गेई ऐ। पुरस्कारें लेई नामांकन छड़े राश्ट्री पुरस्कार पोर्टल पर ऑनलाइन हासल कीते जाडन। ब'रे 2026 लेई पद्म पुरस्कारें दा ऐलान गणतंत्र दिवस, 2026 दे मौके उप्पर कीता जाहगा। एकड़े पुरस्कारें च - पद्म विभूषण, पद्म भूषण ते पद्म श्री पुरस्कार शामिल ना। एह पुरस्कार विशिष्ट कम्में गी मान्यता प्रदान करने लेई सब्भनें खेत्तरें ते विशें च विशिष्ट ते असाधारण उपलब्धियें सने सेवा लेई दित्ता जं'दा ऐ।